

SCRIPT OF MORNING GOJRI NEWS BULLETIN 1MAR 2025 1015HRS

مارننگ گوجری نیوز بولیٹن 1 مارچ 2025

یوہ آکاشوانی جموں باغ علی طاہر تیں خبر سُنو۔

LG SEMINAR

لیفٹیننٹ گورنر منوج سنہا نے کل کشمیر یونیورسٹی سرینگر ماہہ سائنس غا قومی دن غا موقع ور منعقد کیا گیا سیمینار سنگ خطاب کیو لیفٹیننٹ گورنر نے اس موقع ور لوکاں ناہہ مبارک دیتا واں معروف سائنسدان سر سی وی رمن ناہہ خراج عقیدت پیش کیو اس سال سائنس غا قومی دن غو موضوع سائنس ماہہ بھارتی نوجوانان ناہہ عالمی قیادت واسطے تیار کرنو تے وکست بھارت ماہہ جدت پیدہ کرنو رکھیو گیو بے اپنا کلیدی نوٹ ماہہ لیفٹیننٹ گورنر نے سائنس تے ٹیکنالوجی غا افروغ علم غا تبادلہ تخلیقی صلاحیتاں ماہہ بابدو کرن تے پائیدار مستقبل ماہہ جدت پیدہ کرن غی ضرورت ور زور دتو عالمی سطح ور ٹیکنالوجی غا بے مچال فروغ ور گل کرتا واں لیفٹیننٹ گورنر غو کہنو تھو جے جموں کشمیر غی تمام یونیورسٹیاں ماہہ مصنوعی زہانت غی لیب قائم کی جانی چائیں تانجے جدید کاری تے تحقیقی سرگرمیاں ماہہ تیزی آنی جاسکے۔

RANA DELEGATION

جل شکتی محکمہ غا وزیر جاوید احمد رانا نے کل ضلع پونچھ غا مینڈر قضبہ ماہہ عوامی رسائی پروگرام غے تحت اک بڑا عوامی کیمپ ماہہ شرکت کی جسمانہ کئی وفداں تے افراد نے اپنا اپنا مسائل تے مشکلات اُن غے باندے رکھیا اس کیمپ غا انعقاد غو مقصد اس علاقہ غا ترقیاتی پس منظر غو پتو لانو تھو کیمپ غے دوران لوکاں نے پانی سپلائی طبی خدمات جنگلات حقوق قانون غی عمل آوری پی ایم اے وائی جی تے قبائلی بہبود جیسا مسائل سنگ وزیر موصوف ناہہ واقف کرایو۔ جناب رانا نے تمام وفود ناہہ اُن غا مسائل غا حل غو یقین دوايو تے کہیو جے سرکار عوامی خدمات لوکاں غا دروازہ توڑی پُجان ور ترجیح دے رہی بے اسے دوران جناب رانا نے مہینڈر غا کسب تے ملک پور غا مقام ور دو پانی سپلائی سکیمیں غو افتتاح وی کیو۔ یہ پانی سپلائی سکیم با الترتیب ۳ کروڑ ۵۲ لکھ تے ۵ کروڑ ۵۴ لکھ روپیاں غی لاگت سنگ مکمل کی گئی ہیں۔ یہ سکیم جل جیون مشن غے تحت مکمل کی گئی ہیں۔

IT MIN CONF

اُبھرتیں ٹیکنالوجی ناہہ ترجیح دین آلا دو روزہ صلاحیت پیدہ کرن غا پروگرام ناہہ کل جموں ماہہ کامیابی سنگ مکمل کرلیو گیو یوہ پروگرام اطلاعات ٹیکنالوجی محکمہ گا وزیر ستیش شرما غی نگرانی ماہہ منعقد ہوو اس موقع ور بولتا واں وزیر موصوف نے علاقہ غی ترقی تے عوامی خدمات غا معیار ناہہ بدھان غی خاطر اُبھرتی ٹیکنالوجی غا استعمال غی اہمیت ور زور پایو۔ اُنہاں نے جموں کشمیر سرکار غی طرفوں ٹیکنالوجی ور مبنی صلاحیتاں کا استعمال ماہہ بابدو کرن غا عہد غو وی ذکر کیو۔ یوہ پروگرام اطلاعاتی ٹیکنالوجی جموں کشمیر تے ودھ وائی نامی تنظیم گا تعاون سنگ منعقد کیو گیو۔

SAKEENA WOMENS DAY

صحت تے طبی تعلیم محکمہ غی وزیر سکینہ اتو نے کل سول سیکرٹریٹ جموں مانہہ اک میٹنگ غی صدارت کرتا واں آئیندہ ۸ مارچ نانہہ خواتین غا بین العقوامی دن غی تیاریاں غو جائیزو لیومینٹنگ مانہہ بولتا واں انہاں نے خواتین غی طرفوں جموں کشمیر غا بکھ بکھ شعباں مانہہ کی گئی خدمات غا اعتراف ور زور پایو۔ انہاں نے متعلقہ افسراں ور زور پایو جے خواتین غی اختیار دبی غا سلسلہ مانہہ کیا جان آلا اقدامات غا فروغ غی خاطر کم کرن غے نال نال ان سرکاری اقدامات بارے کواتین مانہہ بیداری پیدہ کی جائے۔

NHW CLOSED

جموں سرینگر قومی شاہراہ کل یعنی جمع آلے روز ٹریفک واسطے بند رہی تے شاہراہ ور بارشاں گی وجہ نال آیا پتھر تے مٹی غا تودا ہٹان غو کم جاری رہیو آکاشوانی جموں غا نمائندہ نے جانکاری دیتا واں دسیو ہے جے قومی شاہراہ جہیڑی جمعرات شام نانہہ ناشری ٹل تے نوینگ ٹل بشکار شاہراہ ور بارشاں غی وجہ نال مٹی غا تودا تے پتھر آجان غا نتیجہ مانہہ بند کردتی گئی تھی۔ اس غی حالت مانہہ جمع آلے روز لگاتار بارش تے برف باری غی وجہ نال مزید خراب ہوگئی تے اس رام شاہراہ ٹریفک واسطے لگاتار بند رکھنی پنی سڑک صاف کرن غی خاطر مسنیری نانہہ کم ور لایو گیو ہے تے ملہ نانہہ سڑک وروں ہٹاں غو کم جاری ہے سڑک کھولیا جان بارے اجوں کوئی وقت نہیں دسیو گیو ہے تے ٹریفک پولیس نے مسافراں نانہہ صلاح دتی ہے جے وے شاہراہ ور سفر کرن تیں گریز کریں تے موسم صاف ہونگی صورت مانہہ سڑک مکمل صاف کیا جان غے بعد ہی ٹریفک نانہہ سڑک ور چلن غی اجازت دتی جائگی۔

ANNOUNCEMENT

علاقائی خبراں غا شعبہ آکاشوانی جموں غی طرفوں ضلع کٹھوعہ واسطے عارضی نامہ نگاراں یعنی پی ٹی سی غا پینل غی خاطر درخواست منگی گئی ہیں۔ مجوزہ پرفارمہ ور عارضی نامہ نگار غی پوسٹ مانہہ دلچسپی رکھن آلا ایسا امیدوار درخواست دے سکیں گا جہیڑا ضلع کٹھوعہ گا بسنیک وین تے اُن غی عمر غی حد 24 براں تیں 50 براں غے بشکار وے۔ پی ٹی سی غی اس پوسٹ واسطے تعلیمی قابلیت پی جی ڈپلومہ یا صحافت غا شعبہ مانہہ ڈگری یا فیر تسلیم شدہ یونیورسٹی تیں گرجویشن غے ہمراہ 2 براں غو صحافت مانہہ تجربو مقرر کیو گیو ہے۔ اس تیں علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہہ تجربو وی ضروری ہے۔ عارضی نامہ نگار غی پوسٹ مانہہ دلچسپی رکھن آلا امیدوار واسطے لازمی ہے جے وہ ضلع صدر دفتر کٹھوعہ مانہہ یا اس تیں 10 کلو میٹر غادائرہ اندر رہائش پزیر وے اس سلسلہ مانہہ درخواست غی بارڈ کاپی ضروری دستاویزات غے ہمراہ ہیڈ ريجنل نیوز یونٹ آکاشوانی پنچترتھی جموں مانہہ بزات خود آئیندہ 7 مارچ توڑی دینی ویگی۔ اس بارے مزید ور دستیاب ہے۔ www.newsonair.gov.in جانکاری ویب سائٹ
